



07183

武林掌故叢編目錄

第二十三集

西湖水利考一卷

國朝吳農祥撰

皋亭倡和集一卷

國朝阮亨編

于忠肅公祠墓錄十二卷

國朝丁丙撰

武林掌故叢編 第二十三集



...

...

...

第二十三集

...

光緒戊戌仲春

西湖水利攷

泉唐胡克勳題

錢塘丁氏嘉惠堂刊

西湖水利攷

西湖水利考

宋蘇文忠公軾曰杭州之有西湖如人之有眉目愚以文忠比西湖於眉目猶淺視西湖也譬之人身血脉治則四支堅強西湖則杭之營衛也且人身六經爲川腸胃爲海九竅爲水注之氣西湖則杭之腸胃也眉目而失清揚未足以爲病營衛不能通水穀則雖有神醫無能救矣眉目而失清揚卽足以爲身累腸胃不能受水穀則雖自以爲無病見之者必反走矣自唐宋以來李長源泌之始開六井白樂天居易

西湖水利考

一

從而修之嘉祐中沈太守文通於六井之南開南井熙寧中陳太守述古又疏之元祐中蘇太守軾患其湮涸復爲經理六井雖由城中開鑿而寔引湖水爲本源陰相灌輸使易斥鹵爲甘醴則西湖非杭之營衛乎白氏之通石函也蘇氏之築石堰也石函之流細其言曰凡放水溉田每減一寸可溉十五餘頃每一復時可溉五十餘頃此石函之利也堰則用瓦筒石槽匯之西湖者注之運河春漲不使汎行秋霖不使驟益制以定而有常自仁和以抵海鹽阡陌數千頃皆賴湖水以救亢旱此石堰之利也諸邑犬牙繡

錯而皆賴湖水則西湖非杭之賜畀乎湖自南宋漸成繁華而元廢不理勝國之初仍之寢成池沼爲民居倡爲濬湖之說者宣德正統時則有都御史劉敷御史吳文元成化弘治正德時後先則有太守胡濬御史謝秉中布政使劉璋按察使楊繼宗御史吳一貫太守楊孟瑛而孟瑛任事至猛議當開者有五漸復唐宋之舊然湖之究不得復者有三一曰積習之難按也自本朝湖勝國自勝國湖元已四百餘年矣昔所云豪右之園古者今皆爲易主之世產也昔所云版籍之漏沒者今皆爲國計之徵辦也無尺寸之

西湖水利考

二

不售於民亦無尺寸之不納於官也今使執子孫所應割之產業以追求其祖宗所當吐之田廬則已夏五郭公所見異辭所聞異辭所傳聞異辭矣况所授受展轉則又齊景公之所樂而皆爽鳩之所貽也能止羣謗之不興乎能防浮議之不格乎温原之賜殆不可必之於郤氏而汶陽之疆豈能遽正之於魯也一曰國賦之難除也湖之遷而爲蕩湖之廢而爲田其來已久而明初定湖蕩正糧每畝二斗七升抄沒官田多至六斗以上可謂重矣以極重之征而民寶之而不忍捨者豈非旱潦無憂而獲利加倍乎如欲

奪其所有必當捨其所應納之賦與役而成化開濬之議起臨湖查勘已不敢明告於君上悉舉其所以然而鋤去稅糧百三十餘石強派之隄西有產之家於是失產者怨而有產者亦怨無幾何而園築如故矣當時劉楊諸公皆具經濟能割化成化時且承平能信大臣爲國爲民之事而始終乖違若此則亦可見任事者之難不第紛紜之口舌已也一曰國費之難供也鄴侯之成六井事奇而費約可以意揣矣蘇文忠之濬湖也請上供額解出糶常平增減折耗之餘米一萬餘石又請降度牒減價出賣募民開治又

西湖水利考

三

奏新舊菱蕩課利錢送錢塘縣收掌謂之開湖司公使庫以備逐年雇人開葑撩淺又計避浮山之險以開龍山之運河用度錢十五萬貫用捍江兵及諸郡廂軍三千人計二年始成由此觀之古人之成一事未有不通前後計畫而能有成者也通前後而計畫未有於國不費一錢不雇一夫而能公私無困者也長蘆之築宋章獻皇后臨朝內出錢數十萬貫龜山河之開神宗亦賜錢十萬貫米十萬石起夫九萬二千人今議濬湖無亦通前後而一計之此尤近日之急著也乃世之以濬湖爲不便者成化志載之矣曰

西湖自宋亡後歷元入明官無厲禁爲官民寺觀侵佔蘇隄池西直抵西山之麓盡成桑田僅留六小港以行缺瓜舟子其酒船無論矣裏湖稍僻皆成私居外湖則自蘇隄北第一橋池東沿西冷橋孤山沿城南南抵南屏爲池蕩田廬彌望湖身窄小昔稱外湖南北十里今五里而近焉浸淫至神熹又可知矣而議者則曰湖濱之爲民恆業也小民男女萬人養生送死身口衣食仰給於此且竈突相接桑柘成林墳冢梧楸林木茂密而忍平其馬鬣塞其井竈是非仁者所爲則應之曰公之所惜者傍湖之三百餘戶也

西湖水利考

四

今之所惜而欲濬之者一郡之風氣數萬戶之生死也全數萬戶與三百戶孰大而孰小爲一郡計盈縮與環湖之民家計可否孰智而孰愚議者又曰湖水西來其勢高城二尺辛弃疾所謂決之可以灌城者是也今分削其勢似亦爲宜則應之曰湖高城卑公無乃誤讀前賢語乎陳同甫欲宋孝宗都建康圖恢復故詭言錢塘不可都以激發庸主耳非實謂湖身高於城如明季汴渠之墊也今以匠氏之槩計之西湖之廣二十里而近郡城之廣四十里而遙非無晉陽之畏智伯樊城之蹙于禁也以二尺二十里之狂

瀾注四十里開東西北三關之地有順而四走耳何能爲害哉而議者則又曰杭地穿城四河東西北水門各受他河之經絡與湖殊隔各河所受潮水及吳山諸源之水本自有餘今上塘之河匯臨平湖而來趨艮山水門抵斷河而止下塘之河中匯三里洋十湖所洩一入新河及壩而止一入下湖及古蕩而止雖東有小河又有清河三閘兼阻二壩與運河寥闊上塘絜下塘高且一丈湖水安得逆流以溉爽河之田耶則應之曰杭城之通西湖沈司務守正言之悉

西湖水利考

五

矣其言曰杭城之水有上中下三河轉展遞注皆受西湖之水三道入城一奔湧金門一奔湧金陸門之一奔清波門流福溝經府縣南過運司及織染局會曲阜橋外南抵藩署之左北達八字橋又播爲二一西經舊五道前穴臬署圍扉越車橋出武林水門止清湖等閘一北經張中丞江學士之門出衆安橋外又播爲二南行則經千勝廟等橋逆流而上至清冷橋迤東穴新宮橋運河沿通江橋直出鳳山水門越南新海月等橋抵浙江驛之南龍山關而止入於江一經巡撫公署過軍橋而東越保安等橋出候潮



水門至永昌會安三壩而止北行則經度生橋貢院  
西橋徑天水等橋順流而下亦出武林水門會清湖  
等閘而止溢則流入下河是曰上河其會安壩內有  
清涼柳林二閘洩入五里塘東新關李王塘至海寧  
長安壩而止南流則入艮山水門並抵巡鹽官署之  
東斷河頭而止是曰中河合上中河諸壩閘之水溢  
而下流舟楫四通東至海北達神京是曰下河由司  
務言思之則開濬誠急矣蓋杭城所賴水道前江後  
湖茅山鹽橋兩河通江潮者也城中所云三道通湖  
水者也然江潮迅疾易壅塞子瞻所謂重修堰閘阻

西湖水利考

六

截江潮不放入城而城中諸河專引湖水爲一郡之  
利是也江潮雖苦櫛爬撈歸之敝而實不可阻子瞻  
所謂猶慮缺乏宜引江水以助之是也江湖似亦並  
重而湖爲主江爲客湖爲清江爲濁湖晝夜灌注江  
則候有潮汐是則防江以卻其泥沙通江以受其灌  
漑固不可廢而湖之爲利尤深矣勝國宣德時海宇  
無事講求國事稍興開濬之說而未及毅然行之成  
化十年撫按諸公得祖其說凡舊隸湖而被侵佔者  
不分遠近盡行芟蕪仍於修復之處築隄表之起段  
橋東至雷峯而止計二千餘丈址一丈五尺上七尺

高五尺湖身始復而豪右爭以爲不便引賠糧之說以逆阻之已作而旋棄由嘉靖以至於熹廟無有敢言之者卽有之卽中以他罪使去官而李侍郎旻至銳身排難引王安石之行水利呂惠卿之壞蘇隄以爲濬湖之罪要而論之唐宋諸賢行之而得遂其志者杭城土薄人稀民未蒙濬湖之利而先受斥鹵之害故事立而功溥勝國諸賢未嘗無白蘇之願而旋作而旋廢者杭郡土厚水深民已食西湖之利而忘其斥鹵之害故論行而物敗之唐宋諸賢行之而無弊者兩朝寬文法以御下下卽以便宜從事其所奏

西湖水利考

七

請朝報夕可未嘗有太府之疑駁度支之靳惜故諸賢得視國事如家事勝國諸賢纖悉動相掣肘不得逞其三尺之喙而戶部自黃冊編定之餘尺寸無從寬假所有奏請每阻於國費故有審侵佔而誤許納糧有當開除而重使賠累而諸賢上無利於國下亦無利於民果能鑿勝國之所以失用唐宋之所以得則不患無任事之臣如李如白如蘇者也

西湖水利續考

仁和吳農祥慶百

西湖形勝爲一郡所藉賴昔賢言之詳矣愚以爲宋之水利與唐異明之水利與宋異本朝之水利又與明異何也唐之水利奪湖於江者也奪湖於江其法利用豬湖使江不至於侵湖而郡受其利矣宋之水利分湖於江者也分湖於江其法利用衛湖使湖強而江弱湖爲主而江爲輔而郡受其利矣唐宋以後斥鹵之境漸化爲膏腴蒔苻之泥已除其枝蔓而沿湖之地一歲收數鍾之益於是築爲僧廬宮觀者十

西湖水利考

八

之二揭爲邱墓園林者十之三隄爲池渚田蕩者十之四勝國自洪永以及於神熹豪右搢紳之家各私湖利爲傳家之產而湖日瘠且隘勢必至於折入於私家而後止其法利湖之開使湖之舊壤得復而後湖足以納萬峰之水湖足以納萬峰之水而後湖之隱者洙者突者激者下通於海者傍穴於山者潛行於地者皆得不逼不削不堙不絕而郡受其利此勝國言西湖者之大概也本朝承勝國彫敝之餘而西湖之水利久置不講而上中下三河受西湖之水從湧金水陸二門奔注者陸則流福一溝沙土填塞

無從引湖以達城於是旱則運司一河龜坼瓢裂浸成平地一雨則吳山諸嶺之水呀呷澎湃澗澗溟溟下至民居上至官署皆懸竈而炊東版以渡爲公私所病水則抵藩署穴臬獄者殘流哽咽僅危一縷以會於清湖等閘水弱不能勝舟泥壅不能載物於是南則經千勝等廟逆流而出鳳山水門北則經度生橋順流而出武林水門者處處爲瓦礫民居所佔譬則人身百脈不通經絡停滯將成痞隔否則痺痿不仁其法利疏湖之支排湖之幹支疏則體輕幹排則氣達體輕則上流可以受幹達則下流無所積而郡

西湖水利考

九

始受其利此本朝言水利於西湖此其大概也今大臣任封疆之責者蒿目而憂已從事於支幹謀於下僚籌於故老舉難與慮始樂於觀成之衆拔其疑根又洗滌閭里橫互吞噬之積習一切勒還之官其策之不可謂不深其行之不可謂不斷矣而愚則鯁鯁然過計者良醫之治病也其藥餌之所不及者酒醴湍之其酒醴之所不及者金石伐之其金石之所不及者針灸救之如功已十有其九而中止則其病又深於膏肓腠理之間故曰樹德務滋除惡務盡也今城中水道民居其九兵居其一今屯戍者割二門以

隸之如八字橋以及張中丞江學士等諸河各隸圖營北人不識水利其所營造互相排窄所居官屋成滿卽歸非子孫授受之產非金錢市易之券責其從公開濬勢必苟且塞責如鋤未能豁容土登不及錯土石建不得高梁橋芟不欲傾馬廐有一於此其成將敗水之性迅而就下土之性疏而善崩必將由淺及深因高臨下春霖秋潦灑渙礪擊滲淫委輸不必一年又將阻塞閱厯歲月弊且仍前此其一也城中諸河湖之支幹也湖則諸河之本源也古之人愛西湖比於眉目者如鏡之不可受塵受塵則清光掩矣

西湖水利考

十

如劍之不可觸穢觸穢則寶氣喪矣古人之狎此湖也植以杞柳夾以芙蓉榮以桃李參以竹柏豈止飾游觀追嘯傲矣哉所以堅隄塹翼根基也今湖中淵泉百道又多抑沒而湖中時長陰沙如昔所謂息壤者隆崇崔嵬坡陀曼衍處處峙起湖中三潭昔云深不見底者波光雲影可得俯浴城中日暮小兒吹角導馬出城萬蹏馳突往往渾濁水色腐敗菱草閱厯歲月或變桑田此其一也愚謂城中諸河隸屯內者旣非如土著戶口可使計工竣事又非如閒田甌脫可置棄而不問亦莫若官自爲之計道里輸畚幹因

原隰呈糗糧必使內外如一方可支久一身之中計已挾筋擗髓揲胃浣腸而一手一足之微不爲除去使留病本爲後日周身之患非智者也至若湖中陰沙當時時挑濬泉眼請如吳越時特置撩兵千人每歲視其梗塞者循環疏通蓋西湖諸泉燦如列星開此則塞彼前埒則後漲以葑弱而易生又卽芟而卽長乘梅雨之候葑根易動之時而撩之此治之以時計者也乘舴艋之舳操笮簪之器因利乘便使葑不至狂蔓沿隄迅撩此又治之不可以時計者也乃國馬爲武事所須而江干曠遠傳有云川澤藏垢宜徒

西湖水利考

十一

馬肆於江干無人居之域採苜蓿則易縱飲齷則安必不可使近西湖亦治西湖之要計也夫治湖而不及慮其本源亦猶日計運河而不計黃河也黃河得其故道而運河自治者有之矣黃河橫隘奔決而日修運河之版闢自謂運河無虞不可得也抑又聞之餘杭南湖者西湖之祖也南湖雖隸餘杭實爲三吳水利要害北塘毀餘邑十六壩首被之浸潰於仁和德清而吳興受其蓄南塘毀餘邑靈源章鄭首被之浸潰於錢塘石門而嘉禾受其害趙宋時京尹趙興篴因湖水旱竭乃引天目山之水自餘杭塘達溜水

橋凡歷數堰桔槔運之以注西湖則又以西湖接南湖之說也治西湖以開通一郡治南湖以開通數郡乃緩急偏全之局也

西湖水利續考終

西湖水利考

主

以緩急偏全之局也

臨之東也當西湖以開通一郡當南湖以開通數郡乃緩急偏全之局也

奉高旭

呼龔

楊譽龍書

戊戌閏三月  
錢塘丁氏刊



皋亭倡和集

戊午春日邀同人遊皋亭山看桃花

阮元

皋亭山下多春風，千樹萬樹桃花紅。  
江城愁雨二十日，放晴小舸來花中。  
三篙新漲紅到底，一片絳雲飛不起。  
仙子霞裳住赤城，麗人靚服臨春水。  
蘭漿搖搖行復回，橫塘香霧轉輕雷。  
薄寒小雨燕支溼，留住濃酣緩緩開。  
兩年我爲行春去，每到花時不相遇。  
崔護重來似去年，劉郎又到成前度。  
詩裏情懷畫裏身，坐中慘綠盡詞人。  
若非才子樽前筆，辜負臨平二月春。

皋亭倡和集

一

阮雲臺閣學師招遊皋亭看桃花因病不赴

陸繼輅

西陵春色慵如許，衙齋一月聽春雨。  
雙棲燕子亦無聊，盡日雕梁作蠻語。  
花朝五日是清明，一樣簫聲喚賣錫。  
金鴨香銷留麝篆，玉鉤風悄下簾旌。  
仙宮曉策探春騎，賞花不減憐才意。  
一路流鶯引出城，萬樹紅圍一峯翠。  
此時山中雲正晴，此時客緒如中醒。  
桃花識我儻相憶，不見花面知花情。  
故園亦有春如繡，花光紅染羅衣透。  
趙女工調錦瑟絃，慈親笑酌蘭陵酎。  
作客平生第一春，感公清讌慰酸辛。  
他時雅集應圖

畫添我花前小病身

奉陪阮雲臺學使臯亭看桃花 陸耀遹

臯亭春水疑天上，穀影半篙生。細浪紅襟燕子掠，波  
來小語呼人上。銀觴綠隄芳草綠，無涯曲曲青溪響。  
柁牙是處仙源知，有路等閒弄水見。浮花花深路轉  
春陰護，蘸影空濛若初曙。赤城玉女偶相逢，步障圍  
綃暗香霧。東風吹雨裏，芳洲十里紅酣住。客舟岸上  
踏歌調，別曲尊前流水動。離愁一半陰霾壓，溪重溼  
翠閣雲雲不動。彌天花雨泛紅潮，春氣濃薰欲成夢。  
共惜芳菲倚畫橈，載香艇子去迢迢。舊山幾日花如  
霰，寂寂春寒掩綺寮。

臯亭倡和集

二

蔣徵蔚

朝煙霏微將作雨，一朵白雲向空吐。弄晴嬌鳥喚行人，  
人水汎花光。花滿鳴昨宵臥病諱，言愁早共花心入。  
畫樓旅舍鐙殘，初中酒歸裝寒峭，尚披裘。今朝共策  
花前騎，誰憐酒醒花猶睡。芳草連天色更青，曉山漬  
雨嵐多翠。此時花氣襲人衣，萬片紅雲香四圍。興酣  
長嘯入雲際，落花滿空停不飛。瓊嬛仙使文章伯，首  
唱清詞兼屬客。元龍豪氣三陸才，花前跌宕揮金戟。  
相逢載酒共看山，只是新愁未許刪。洞口桃花人易

別西湖楊柳不勝攀玉簫自倚春風裏此去仙源知  
幾里惆悵尋春易歸眼見華年送流水勸君莫更  
催雙娥我憐花謝花前歌吳山越水別春去其奈楊  
花似雪何

庚申上巳雲臺師偕諸同人於皋亭山修禊作

圖紀事

陳文述

迎眸山色一痕青修禊人來畫舫停一種桃花與修  
竹皋亭原不讓蘭亭

折花都向綠鬟簪女伴嬰春約兩三莫倚東風笑遊  
冶紅妝小隊正祈蠶

皋亭倡和集

三

花下親扶杖履來花簪華髮笑顏開羽觴浮向桃花  
水都與先生作壽杯

紅雲白雪間如何萬點濃香漲綠波三載春風舊桃  
李可知還比此閒多

吳文溥

霏霏旌旆出城遙灩灩波紋動畫橈好景眼前拋不  
得官詩吟過半山橋

半山彌望爛成霞教拓船窗四面紗同在錦屏風裏  
坐老人顏色勝桃花

樓上人看樓下船模糊遠水多含煙折花歸去意不

盡舵尾一枝紅可憐

孫韶

五日東風三日雨桃花萬樹春無語溪光昨夜轉新晴一片玻璃劃柔櫓夾岸桃花引出城湔裙水暖午風輕帆從嘯鳥聲中轉人在春山畫裏行行行路入花深處穠李夭桃豔無數白雪千重暈曉霞紅香十里籠春霧使君欲博親顏歡緩步相隨橋上看斑衣熏處香如海鳩杖扶來花作團紛紛賓從皆名士流觴齊向桃花水桃花顏色冶春詞一樣風前舒豔綺我愧羊劉詩後成如陪羲獻會蘭亭蘭亭禊後皋亭

皋亭倡和集

四

禊修竹桃花萬古情

程邦憲

小雨十日輕寒過東風吹綠前溪波盪空紅雲漾春海一夜染遍天桃柯天桃無語羞人面路入繁花人不見阿誰長帶綰紅霓團住花光成一片初疑赤城霞綺連又如遠燒騰上前點點燕支墮紅雪濛濛旭日浮晴煙穠姿冶態看不足更尋花鳴曲復曲雙撓衝出萬花中避人驚起鴛鴦浴雛姬十五唱春詞手挽青青楊柳枝柔波一色膩春影青山倒浸紅玻璃玻璃擊碎眾仙舞漫天錦幃迷花雨桃葉桃根總可

隣絳綃抹額爭眉嫵斯時座客喜欲狂清詞霏豔齒  
頰香弄花不覺春著手酌酒空見霞流觴使君折花  
笑向客無使春光坐虛擲春風一夜飄繁英瘦盡桃  
花肥到麥

許文珩

故人留我錢塘住兩度皋亭看桃去十里花光不斷  
紅茱萸李白紛無數去年放櫂春陰濃花光淡處煙  
濛濛今年雨急舟初轉兀兀篷窗坐淹蹇春風到處  
能留客花自乘春弄顏色似識儂生只解愁無言淚  
漬燕支赤今年花老去年新今年客多非舊人主人

皋亭倡和集

五

年年作遊主何人長伴皋亭春看花例有贈花詩詩  
寫花情更寫時今年苦憶春江北棖觸鄉心我最知  
我年四十他鄉半湘水湘山舊遊慣處處鄉心處處  
多年年春色年年換主人堂上春暉長主人行處春  
風揚馱隣遊客非年少辜負桃花醉萬觴

黃文暘

前年泗濱看紅杏十里花光照鞭影今年皋亭看天  
桃花光紅透水三篙年來萬事多疏懶青青只贖看  
花眼老翁七十何所求手折花枝插滿頭鬚眉都學  
李花白羞見桃花好顏色坐中慘綠盡風華我似桃

林雜李花舉酒酌花還勸客眼前光景休虛擲昨日  
春雨前日風催綻桃花萬樹紅幾彎碧水通歌舫當  
面青山開畫幃菜花鋪地柳拖煙寫出清明二月天  
多謝春工好點綴都爲桃花添染抹莫將薄命歎紅  
顏結實還能比大還我與主人重訂約秋禊此閒應  
更樂高堂奉酒祝千秋不用蟠桃問十洲  
癸亥閏二月海塘迴舟過半山看桃花作歌

皋亭萬樹桃花紅李花三千爭暖風梨花淡白不相  
競菜花滿地黃蓬蓬如此花光真爛漫百二春天方

皋亭倡和集

六

過半千行錦繡羣山川一片雲霞落霄漢或說林花  
如美人燕支金粉鬪青春又疑花枝似文筆染出詞  
頭五色新美人文筆俱休說終是此花擅奇絕甘遜  
村前好夕陽幾年寒食清明節年年邀客來看花好  
花耐得詩人誇我今欲歸歸未得春風渡江先到家  
我家近在春江北夜月鶯花苦相憶迎鑾鎮北深江  
邊十里緋桃盡春色江南江北花孰多花多花少皆  
當歌千紅萬紫不來看花自春風人奈何

癸亥冬日皋亭探梅偕陳曼生阮亭

尋偏峯巔與水涯不知何處有梅花吟回官閣春方

到夢入羅浮路未差風外雲煙香漸度谿邊冰雪影  
初斜此閒似比孤山好一角青螺插暮霞

張鑑

如海寒香占水涯山深今又見梅花瘦同老鶴風情  
遠冷入春雲歲月差坐久但愁篷背滿歸遲須插帽  
簷斜官齋留得冬心在短笛聲高夢落霞

槐

不向山巔便水涯連宵詩夢繞梅花春如遠客來無  
信香在寒雲認又差孤鶴出籬迎棹久瘦筇和月入  
林斜歸來東閣親邀笛吹落遙城一片霞

皋亭倡和集

七

林述曾

春風吹雪到天涯探得寒梅又著花伴我冰心真耐  
冷依人香夢莫爭差影浮淺水千層豔路入深山一  
徑斜攜共揚州二分月好隨東閣醉流霞

郭麐

信是吾生未有涯皋亭十度見梅花時逢野老留相  
住喚作梨雲夢已差銅井銅坑山犖确枝南枝北月  
橫斜披圖那禁前塵感爲失新宮蔡少霞

張興鏞

風雪侵尋歲有涯冷香飛上隔溪花何郎官閣情猶

昔仙子天台路恐差宿醞易傾山榼小吟橈好倚一枝斜勞生似我兼多病極目皋亭鎖暮霞

黃文暘

蠟屐尋春問水涯靜參鼻觀悟非花前生幾世修能到舊路三更夢不差清太逼人姿峭直瘦真如鶴影欹斜幽情踏徧山中雪色界休猜海上霞

閔志壇

逸興平生詎有涯衝寒不惜爲梅花關心凍雀聲初啁屈指春風信未差幾樹遠藏松徑冷一枝近出竹林斜長吟竟日忘歸去鶴唳空山月映霞

皋亭倡和集

八

甲子春日半山看桃花復題庚申同人看花圖

阮元

春花何處來消息甚輕捷一夜皋亭山綠遍新柳葉桃紅千萬樹萼破不能攝年年看花來蘭漿復桂楫出城泛花溪燦然撲吾睫平田遠無際菜花鋪黃氍眾芳十里餘枝柯盡交接上有借巢鶯下有逐花蝶照人水亦紅入衣香更裊沿溪彩虹長曲港朱霞疊譬如金谷園錦障齊出篋又如黃荃畫脂粉調花頰爛若狄公門豔若子敬妾見慣尙無異新客驚歎輒艤舟登石橋俯視情更愜一朵五色雲落地何妥貼



山上多松嵐其勢欲凌躡萬花雖極妍爲此頗伏厭  
乃知歲寒姿儘與春風涉春風易爲色歲寒疇不懼  
侍家大父遊皋亭山看桃花阮常生

桃花萬樹皋亭東菜花掩映千畝同小橋路轉舟亦  
轉紅雲一色開東風山南山北二十里渾似赤城晚  
霞起花開古渡招遊人倒浸紅顏入波底船頭破浪  
侵香痕隄邊小泊近山村桃花四面抱茅屋茅屋無  
人深閉門去年別後逢今日含笑無言似曾識最宜  
宿雨助花光嫣紅新著臙脂色更隨杖履過山前蕩  
漾風光二月天身在仙源最佳處何須支枕夢遊仙  
更有李花團白雪相閒桃花光皎潔紅白續紛鬪豔  
陽又添綠柳殊清絕正當歡賞卻忘歸細雨濛濛點  
客衣不是催人放歸櫂欲催驂客早成詩

乙丑二月得桃花消息同人復修皋亭之禊是  
日兄以事不果游阮亭

春滿皋亭一水涯梅花探後看桃花良時頓覺詩情  
健勝引休言足力差冷浸白雲千頃住溼飛紅雨半  
篙斜年年好與東風約但有桃花便是家

黃文暘

維摩耽病是生涯天女多情爲散花老去情懷原未

滅霧中眼力竟全差半篙間渡溪多曲幾樹當門影  
欲斜我已重來曾識路還將雞犬認人家

顧廷綸

淺白深紅暈水涯一年來看一回花春如有約期先  
到人記重遊路未差香霧遠迷芳鏡曉豔枝爭倚綠  
波斜不須更覓仙源渡但傍花材便當家

張鑑

朱朱白白渺無涯三度開花一看花甘遜村邊春正  
永臨平湖上路難差種當山寺香車滿紅近江橋酒  
旆斜傳語東風好流轉再來我自認仙家

皋亭倡和集

十

阮蔭曾

皋亭十里水之涯五載杭州未訪花滿徑不言春自  
在隔溪有路認偏差如聞翠羽谿頭語好趁錫簫竹  
外斜何日扁舟湖上路卻看紅雨過山家

皋亭余屢游看桃探梅均有詩時往來於心胸  
一日雲公來辭移席佛日出示皋亭雲隱圖深  
得黃鶴山樵筆意屬余錄家兄與同人先後倡  
和之作隨檢舊稿寫付之留作山中故事爲將  
來重尋鴻爪之券乙亥春三月阮亨識

皋亭倡和集終

于公錄

忠祠

肅墓

仁和玉同謹署



光緒庚子  
季春之月  
泉唐丁氏  
刊於甬東

余幼從仁和楊粉園師游尙論杭之先哲師以于忠肅公爲巨擘相與登三台山瞻拜祠墓景仰久之竊以爲

國家祀典之最崇者莫如從祀 文廟由唐宋以迄元明從祀者皆生前箸述宏富有功聖教至我

朝始以漢諸葛亮唐陸贄宋范仲淹韓琦李綱文天祥諸先儒從祀誠以孔子之道內聖外王一以貫之歷代名臣淑修於身以聖人之心爲心則徵諸實事以聖人之政爲政卽不愧爲聖人之徒若忠肅公於前明有再造之功以視兩廡諸賢儒洵無愧色矣長

于公祠墓錄自序

遭寇亂粵賊捻匪蹂躪幾遍天下外洋構衅 輦轂震驚木蘭

秋獮感懷時局益念忠肅之肝膽才識令人思慕不已同治甲子運際中興左文襄盪平兩浙余謁見之餘卽請文襄入告以忠肅從祀 文廟文襄以兩浙名儒見詢余又以張楊園先生對文襄謂宜并請命余先修楊園祠墓工未畢而文襄移節八閩未踐前諾己已春余與吳君曉帆濮君少霞呈請撥款重修忠肅祠墓監工之暇博采志傳及祠墓記文詩章彙爲一編俾免遺佚並重刊奏議十卷以廣其傳嗣又



錢塘丁松生先生既校刊于忠肅公奏議復輯祠墓錄十卷旁徵博考自傳紀詩文以及舊說之散見於別集者彙而聚之始於同治己巳成於光緒戊戌自爲之序其明年先生歸道山又明年令子和甫孝廉將鐫之版以示余余惟夫先生篤行體道不耽世榮而名滿天下鄉國賴之朝廷褒之蓋其生平凡義之盡乎已善之及乎人者雖勞不辭雖艱必舉設施具在眾言有徵矣其於名臣大儒之故實忠孝廉節之流傳蒐討尤勤甄采之惟恐不盡崇顯之惟恐不及殫精窮年曾不少休止是編其一端耳夫紀述前言往行旌揚遺蹟以示後來使人知所感動效法仁者之用心也忠肅當天崩地岌之日不動聲色措天下磐石之安返故主蒙塵之轍豈惟才識大過乎人抑學術純正志趣堅確直躋古昔聖賢之徒孟子曰奮乎百世之上百世之下聞者莫不興起也忠肅有焉先生之輯是編也如徒曰以浙人尊浙人則淺之乎視此矣觀其自序感懷時局益思忠肅之爲人嗚呼豈不遠哉光緒庚子夏六月長沙張濬萬

于公祠墓錄張序

于公祠墓錄卷首 江蘇特用知縣臣丁丙恭摹

恩榮

乾隆御筆之寶

丹心抗節

于公祠墓錄卷首

一

欽定明史列傳 于謙字廷益錢塘人生七歲有僧  
奇之曰他日救時宰相也舉永樂十九年進士宣德  
初授御史奏對音吐鴻暢帝為傾聽顧佐為都御史  
待寮屬甚嚴獨下謙以為才勝己也扈蹕樂安高煦  
出降帝命謙口數其罪謙正詞嶄嶄聲色震厲高煦  
伏地戰慄稱萬死帝大悅師還賞賚與諸大臣等出  
按江西雪冤囚數百疏奏陝西諸處官校為民害詔  
遣御史捕之帝知謙可大任會增設各部右侍郎為  
直省巡撫乃手書謙名授吏部超遷兵部右侍郎巡  
撫河南山西謙至官輕騎徧歷所部延訪父老察時

事所宜興革卽具疏言之一歲凡數上小有水旱輒上聞正統六年疏言今河南山西積穀各數百萬請以每歲三月令府州縣報缺食下戶隨分支給先菽秫次黍麥次稻俟秋成償官而免其老疾及貧不能償者州縣吏秩滿當遷預備糧有未足不聽離任乃令風憲官以時稽察詔行之河南近河處時有衝決謙令厚築隄障計里置亭亭有長責以督率修繕並令種樹鑿井榆柳夾路道無渴者大同孤懸塞外按山西者不及至奏別設御史治之盡奪鎮將私墾田爲官屯以資邊用威惠流行太行伏盜皆避匿在官

于公祠墓錄卷首

二

九年遷左侍郎食二品俸初三楊在政府雅重謙謙所奏朝上夕報可皆三楊主持而謙每議事京師空橐以入諸權貴人不能無望及是三楊已前卒太監王振方用事適有御史姓名類謙者嘗忤振謙入朝薦參政王來孫原貞自代通政使李錫阿振指劾謙以久不遷怨望擅舉人自代下法司論死繫獄三月已而振知其誤得釋左遷大理寺少卿山西河南吏民伏闕上書請留謙者以千數周晉諸王亦言之乃復命謙巡撫時山東陝西流民就食河南者二十餘萬謙請發河南懷慶二府積粟以振又奏令布政使



年富安集其眾授田給牛種使里老司察之前後在任十九年丁內外艱皆令歸治喪旋起復十三年以兵部左侍郎召明年秋也先大入寇王振挾帝親征謙與尙書鄜堃極諫不聽堃從治兵留謙理部事及駕陷土木京師大震眾莫知所爲鄜王監國命羣臣議戰守侍講徐瑄言星象有變當南遷謙厲聲曰言南遷者可斬也京師天下根本一動則大事去矣獨不見宋南渡事乎王是其言守議乃定時京師勁甲精騎皆陷沒所餘疲卒不及十萬人心震恐上下無固志謙請王檄取兩京河南備操軍山東及南京沿

干公祠墓錄卷首

三

海備倭軍江北及北京諸府運糧軍亟赴京師以次經畫部署人心稍安卽遷本部尙書鄜王方攝朝廷臣請族誅王振而振黨馬順者輒叱言官於是給事中王竑廷擊順眾隨之朝班大亂衛卒聲洶洶王懼欲起謙排眾直前掖王止且啟王宣諭曰順等罪當死勿論眾乃定謙袍袖爲之盡裂退出左掖門吏部尙書王直執謙手歎曰國家正賴公耳今日雖百王安危爲己任初大臣憂國無主太子方幼寇且至詩皇太后立鄜王王驚謝至再謙颺言曰臣等誠憂國

家非爲私計王乃受命九月景帝立謙入對慷慨泣  
奏曰寇得志要留大駕勢必輕中國長驅而南請飭  
諸邊守臣協力防遏京營兵械且盡宜亟分道募民  
兵令工部繕器甲遣都督孫鐘衛穎張軌張儀雷通  
分兵守九門要地別營郭外都御史楊善給事中王  
竑參之徙附郭居民入城通州積糧令官軍自詣關  
支以贏米爲之直毋棄以資敵文臣如軒輓者宜用  
爲巡撫武臣如石亨楊洪柳溥者宜用爲將帥至軍  
旅之事臣身當之不效則治臣罪帝深納之十月敕  
謙提督各營軍馬而也先挾上皇破紫荆關直入窺

于公祠墓錄卷首

四

京師石亨議斂兵堅壁老之謙不可曰奈何示弱使  
敵益輕我亟分遣諸將率師二十二萬列陣九門外  
都督陶瑾安定門廣寧伯劉安東直門武進伯朱瑛  
朝陽門都督劉聚西直門鎮遠侯顧興祖阜成門都  
指揮李端正陽門都督劉得新崇文門都指揮湯節  
宣武門而謙自與石亨率副總兵范廣武興陳德勝  
門外當也先以部事付侍郎吳甯悉閉諸城門身自  
轉戰下令臨陳將不顧軍先退者斬其將軍不顧將  
先退者後隊斬前隊於是將士知必死皆用命副總  
兵高禮毛福壽卻敵彰義門北禽其長一人帝喜令

謙選精兵屯教場以便調用復命太監興安李永昌同謙理軍務初也先深入視京城可旦夕下及見官軍嚴陣待意稍沮叛闖喜寧嗾使邀大臣迎駕索金帛以萬萬計復邀謙及王直胡濙等出議帝不許也先氣益沮庚申寇窺德勝門謙令亨設伏空舍遣數騎誘敵敵以萬騎來薄副總兵范廣發火器伏起齊擊之也先弟孛羅平章卯那孩中礮死寇轉至西直門都督孫鏜禦之亨亦分兵至寇引退副總兵武興擊寇彰義門與都督王敬挫其前鋒寇且卻而內官數百騎欲爭功躍馬競前陣亂輿被流矢死寇遂至

于公祠墓錄卷首

五

土城居民升屋號呼投輒石擊寇譁聲動天王竝及福壽援至寇乃卻相持五日也先邀請旣不應戰又不利知終弗可得志又聞勤王師且至恐斷其歸路遂擁上皇由良鄉西去謙調諸將追擊至關而還論功加謙少保總督軍務謙曰四郊多壘卿大夫之恥也敢邀功賞哉固辭不允乃益兵守眞保涿易諸府州請以大臣鎮山西防寇南侵景泰元年三月總兵朱謙奏敵二萬攻圍萬全敕范廣充總兵官禦之己而寇退謙請卽駐兵居庸寇來則出關劔殺退則就糧京師大同參將許貴奏迤北有三人至鎮欲朝廷

遣使講和謙曰前遣指揮李鐸岳謙往而也先隨入寇繼遣通政王復少卿趙榮不見上皇而還和不足恃明矣況我與彼不共戴天理固不可和萬一和而彼肆無厭之求從之則坐做不從則生變勢亦不得和貴爲介冑臣而惟怯如此何以敵愾法當誅移檄切責自是邊將人人主戰守無敢言講和者初也先多所要挾皆以喜甯爲謀主謙密令大同鎮將禽甯戮之又計授王偉誘誅閒者小田兒且因謀用閒請特釋忠勇伯把台家許以封爵使陰圖之也先始有歸上皇意遣使通款京師稍解嚴謙上言南京重地

于公祠墓錄卷首

六

撫輯須人中原多流民設遇歲荒嘯聚可虞乞敕內外守備及各巡撫加意整飭防患未然召還所遣召募文武官及鎮守中官在內地者於時八月土皇北狩且一年矣也先見中國無釁滋欲乞和使者頻至請歸上皇大臣王直等議遣使奉迎帝不悅曰朕本不欲登大位當時見推實出卿等謙從容曰天位已定甯復有他顧理當速奉迎耳萬一彼果懷詐我有辭矣帝顧而改容曰從汝從汝先後遣李實楊善往卒奉上皇以歸謙力也上皇旣歸瓦剌復請朝貢先是貢使不過百人正統十三年至三千餘賞賚不饜

遂入寇及是又遣使三千來朝謙請列兵居庸關備不虞京師盛陳兵宴之因言和議難恃條上安邊三策請敕大同宣府永平山海遼東各路總兵官增修備禦京兵分隸五軍神機三千諸營雖各有總兵不相統一請擇精銳十五萬分十營團操團營之制自此始具兵志中瓦剌入貢每攜故所掠人口至謙必奏酬其使前後贖還累數百人初永樂中降人安置近畿者甚眾也先入寇多爲內應謙謀散遣之因西南用兵每有征行輒選其精騎厚資以往已更遣其妻子內患以息楊洪自獨石入衛入城悉以委寇謙

于公祠墓錄卷首

七

使都督孫安以輕騎出龍門關據之募民屯田且戰且守八城遂復貴州苗未平何文淵議罷二司專設都司以大將鎮之謙曰不設二司是棄之也議乃寢謙以上皇雖還國恥未雪會也先與脫脫不花構請乘閒大發兵身往討之以復前仇除邊患帝不許謙之爲兵部也也先勢方張而福建鄧茂七浙江葉宗留廣東黃蕭養各擁眾僭號湖廣貴州廣西徭獠田獠所至蜂起前後征調皆謙獨運當軍馬倥偬變在俄頃謙目視指屈口具章奏悉合機宜僚吏受成相顧駭服號令明審雖勳臣宿將小不中律卽請旨切

責片紙行萬里外靡不惕息其才略開敏精神周至一時無與比至性過人憂國忘身上皇雖歸口不言功東宮既易命兼宮僚者支二俸諸臣皆辭謙獨辭至再自奉儉約所居僅蔽風雨帝賜第西華門辭曰國家多難臣子何敢自安固辭不允乃取前後所賜璽書袍錠之屬悉加封識歲時一省視而已帝知謙深所論奏無不從者嘗遣使往眞定河閒采野菜直沽造乾魚謙一言卽止用一人必密訪謙謙具實對無所隱不避嫌怨由是諸不任職者皆怨而用弗如謙者亦往往嫉之比寇初退都御史羅通卽劾謙上

于公祠墓錄卷首

八

功簿不實御史顧暉言謙太專請六部大事同內閣奏行謙據祖制折之戶部尙書金濂亦疏爭而言者摺據不已諸御史以深文彈劾者屢矣賴景帝破眾議用之得以盡所設施謙性故剛遇事有不如意輒拊膺歎曰此一腔熱血竟灑何地視諸選奕大臣勳舊貴戚意頗輕之憤者益眾又始終不主和議雖上皇實以是得還不快也徐理以議南遷爲謙所斥至是改名有貞稍稍進用嘗切齒謙石亨本以失律削職謙請宥而用之總兵十營畏謙不得逞亦不樂謙德勝之捷亨功不加謙而得世侯內媿乃疏薦謙子

冕詔赴京師辭不允謙言國家多事臣子義不得顧私恩且亨位大將不聞舉一幽隱拔一行伍微賤以裨軍國而獨薦臣子於公議得乎臣於軍功力杜僥倖決不敢以子濫功亨復大志都督張軌以征苗失律爲謙所劾與內侍曹吉祥等皆素憾謙景泰八年正月壬午亨與吉祥有貞等既迎上皇復位宣諭朝臣畢卽執謙與大學士王文下獄誣謙等與黃竑構邪議更立東宮又與太監王誠舒良張永王勤等謀迎立襄王子亨等主其議喉言官上之都御史蕭維禎定讞坐以謀逆處極刑文不勝誣辯之疾謙笑曰

千公祠墓錄卷首

九

亨等意耳辯何益奏上英宗尙猶豫曰于謙實有功有貞進曰不殺于謙此舉爲無名帝意遂決丙戌改元天順丁亥棄謙市籍其家家戍邊遂溪教諭吾豫言謙罪當族謙所薦舉諸文武大臣並應誅部議持之而止千戶白琦又請榜其罪鏤板示天下一時希旨取寵者率以謙爲口實謙自值也先之變誓不與賊俱生嘗留宿直廬不還私第素病痰疾作景帝遣興安舒良更番往視聞其服用過薄詔令上方製賜至醯菜畢備又親幸萬歲山伐竹取漈以賜或言寵謙太過興安等曰彼日夜分國憂不問家產卽彼去

令朝廷何處更得此人及籍沒家無餘貲獨正室鏞  
鑰甚固啟視則上賜蟒衣劔器也死之日陰霾四合  
天下冤之指揮朵兒者本出曹吉祥部下以酒醉謙  
死所慟哭吉祥怒挾之明日復酌奠如故都督同知  
陳達感謙忠義收遺骸殯之踰年歸葬杭州達六合  
人故舉將才出李時勉門下者也皇太后初不知謙  
死比聞嗟悼累日英宗亦悔之謙既死而亨黨陳汝  
言代爲兵部尙書未一年敗賊累巨萬帝召大臣入  
視愀然曰于謙被遇景泰朝死無餘貲汝言抑何多  
也亨俯首不能對俄有邊警帝憂形於色恭順侯吳

于公祠墓錄卷首

十

瑾侍進曰使于謙在當不令寇至此帝爲默然是年  
有貞爲亨所中戍金齒又數年亨亦下獄死吉祥謀  
反族誅謙事自成化初寃赦歸上疏訟寃復得官賜  
祭詣曰當國家之多難保社稷以無虞惟公道之獨  
持爲權姦所並嫉在先帝已知其枉而朕心實憐其  
忠天下傳誦焉弘治二年用給事中孫孺言贈特進  
光祿大夫柱國太傅諡肅愍賜祠於其墓曰旌功有  
司歲時致祭萬厯中改諡忠肅杭州河南山西皆世  
奉祀不絕寃字景瞻蔭授副千戶坐戍龍門謙寃旣  
雪并復寃官自陳不願武職改兵部員外郎居官有



幹局累遷至應天府尹致仕卒無子以族子允忠爲後世襲杭州衛副千戶奉祠吳甯字永清歛人甯方介有識鑑嘗爲謙擇婿得千戶朱驥贊曰于謙爲巡撫時聲績表著卓然負經世之才及時遭艱虞繕兵固圉景帝旣推心置腹謙亦憂國忘家身繫安危志存宗社厥功偉矣變起奪門禍機猝發徐石之徒出力而擠之死當時莫不稱冤然有貞與亨吉祥相繼得禍皆不旋踵而謙忠信義烈與日月爭光卒得復官賜卹公論久而後定信夫

御批通鑑輯覽

徐理果精於占候當象緯告警卽

于公祠墓錄卷首

七

應剴切密奏以抒忠愛乃惟急急遣孥歸里止知保其身家而不復關心國是已乖臣分及敗報旣聞人言洵洵理輒敢妄言天命已去倡議南遷使從其議則燕京必如宋汴京之淪陷而英宗幾成靖康乘輿不返誤國之罪更不容誅使非于謙急召外藩勤王死守則根本一搖動大事不可必又安望他日之復辟乎是宗澤李綱所未能行之於宋時者謙獨能行之於明室英宗之得歸故國謙實不爲無功乃奪門以後程荷殊榮謙遭慘禍刑賞倒置豈天下爲公之道哉景帝任于謙排羣議而力戰守不可謂無功

於宗社獨是英宗還國僻處南宮事同禁錮而廢后  
易儲有貪心焉天道好還子亦隨死終於殺禮西山  
實所自取耳然英宗亦豈得辭寡恩尺布之譏哉至  
於于謙社稷爲重之言蓋出於呂飴甥喪君有君及  
公孫申爲將改立晉必歸君之意後世諸儒無不以  
是爲譴夫君猶親也親爲人執爲子者不被髮纓冠  
而往救之以示不急其可乎則意欲之獄有由來或  
猶以爲非英宗意眞不識事體者之言耳然則當時  
宜從和議乎曰不其之讎安得與和繕甲治兵以從  
其後如岳飛之力戰迎二帝天下其誰非之 王直

于公祠墓錄卷首

三

與羣臣交章其請奉迎實爲正言讜論而景泰竟爾  
不憚至有復作紛紜之詰則所謂非貪此位正其強  
顏自文而中情已不可掩于謙窺其隱微知不可以  
理奪故以微語釋其疑而堅其志而遣使之議始定  
額森遂以禮送還上皇謙此舉可謂善於匡救而返  
正之後殘加誅戮英宗可謂少恩矣 景泰得位跡  
同竊取而自英宗還國以後於尊奉敬恭之道一切  
蕩然久已忍心蔑棄其君而見深之立旨也 後至  
於廢立之際則不復請命東朝是并蔑視其母矣若  
黃竑不過蠻貊夷目安知中國情事而其疏中揣摩

迎合之言又豈荒服侏儻者所能辦此必陳循輩預受分金之餌希旨邀榮借竝以發其端耳至于謙不諫易儲一事論者紛如謙在當時實能公忠體國者若竟如諸人之阿順苟容必無是理觀賜金之獨不及謙則安知非謙已有造膝之陳景泰稔其意不可奪故不復相屬耶且謙前諫奉迎賴譎辭以成事而此則無可詭託又不可祗沽一己之名而於事仍無濟故不復犯顏強諍耳不然謙素爲景泰所倚任苟非有深拂其隱之嫌何以天順復辟時聞鐘聲而遽有疑是于謙之問耶

于公墓錄卷首

三

欽定南巡盛典 諭祭文 維乾隆十六年歲次辛未三月戊戌朔 皇帝遣副都統多爾濟致祭於明臣于謙之靈曰惟爾才優經濟志篤忠貞著績烏臺已樹偉人之望宣猷憲府足徵命世之才運會遭於艱難心存宗社時事當夫搶攘身繫安危東市朝衣完全歸之浩氣西林片碣垂不朽之鴻名朕清蹕武林緬懷餘烈丹心炳煊偕日月以爭光遺廟巍峩與湖山而並峙爰修秩祀用薦蘋蘩靈如有知尙其歆格 維乾隆三十二年歲次丁丑二月癸亥朔越二

十九日辛卯 皇帝遣經筵講官戶部左侍郎劉綸

致祭於明臣于謙之靈曰惟爾南邦潔士勝國名臣  
出建旗徽已見經文而緯武入參帷幄彌彰憂國而  
忘家當時事之艱危藉長才爲保障陳師鞠旅從容  
定敵愾之謀草檄飛符慷慨著守陴之烈雖奇功暫  
屈於當日而定論終炳於千秋朕載舉省方緬懷遺  
躅丹心青史忠魂猶傍夫靈濤碧瓦朱旗祠屋長留  
於勝地載陳牲醴爰布几筵禮有攸隆靈其用享

欽定四庫全書總目提要 于忠肅集十三卷明于  
謙撰謙字廷益錢塘人永樂辛丑進士授御史歷官  
兵部尙書英宗復辟爲徐有貞石亨等誣陷棄市成

于公祠墓錄卷首

十四

化初追復原官弘治初贈特進光祿大夫柱國太傅  
諡肅愍萬曆中改諡忠肅事蹟具明史本傳倪岳作  
謙神道碑稱謙平生著述甚多僅存節庵詩文集奏  
議若干卷禍變之餘蓋千百之什一云云是其歿後  
遺藁已多散佚世所刊行者乃出後人掇拾而成故  
其本往往互有同異明史藝文志載謙奏議十卷文  
集二十卷又嘉靖中河南刊本詩文共八卷而無疏  
議此本前爲奏議十卷分北伐南征雜行三類與藝  
文志合後次以詩一卷雜文一卷附錄一卷與藝文  
志迥異與嘉靖刊本亦迥異蓋又重經編次非其舊

本也謙遭逢厄運獨抱孤忠憂國忘家計安宗社其  
大節炳垂竹帛本不藉文字以傳然集所載奏疏明  
白洞達切中事機較史傳首尾完整尤足覘其經世  
之略至其詩風格道上興象深遠雖志存開濟未嘗  
於吟詠求工而品格乃轉出文士上亦足見其才之  
無施不可矣又案王世貞名卿續記及李之藻序謙  
集皆謂謙嘗再疏請復儲今集中實無此疏明史亦  
不著其事惟倪岳神道碑稱景帝不豫謙同廷臣上  
章乞復皇儲是當時所上乃廷臣公疏非謙一人故  
集中不載其稟世貞等專屬之謙殆亦考之未審歟

于公祠墓錄卷首

五

于公祠墓錄卷首終

于公墓錄卷一

錢塘丁丙輯

祠墓

旌功祠

欽定圖書集成 旌功祠在府城三台山祀明少保  
兵部尙書贈太傅謚肅愍于謙弘治三年訓導儲衍  
禮科給事中孫孺謙子府尹冕先後陳請命下建祠  
墓所賜額汀州知府海甯張寧爲記嘉靖十六年巡  
按御史周汝員屬錢塘知縣李念新之嗣是而巡按  
御史傅鳳翔閩鄉王紳巡鹽御史高封相繼協修提

于公墓錄卷一

一

學副使南昌張鏊爲記

欽定西湖志纂 旌功祠在三台山祀明少保兵部  
尙書贈太傅謚忠肅于謙西湖游覽志謙字廷益錢  
塘人正統十二年乘輿北狩郟王卽位謙以兵部尙  
書外攘內撫有社稷功英廟復辟石亨徐有貞等誣  
謙不軌竟以冤死子冕奉葬於此成化二年廷議始  
白上遣行人馬瞻諭祭賜謚肅愍建祠曰旌功錢塘  
縣志萬曆三十年改謚忠肅諭祭葺祠 國朝順治  
間修仍令春秋致祭乾隆十二年復修十六年春

聖駕南巡

御題匾額曰丹心抗節

欽定大清一統志 忠肅祠卽旌功祠在府城祀明  
于謙 本朝乾隆十六年

敕賜丹心抗節匾額

明一統志 旌功祠在三台山祀本朝于肅愍公弘

治間賜諡建祠歲春秋祭

嘉靖浙江省志 旌功祠在三台山祀本朝于肅愍

公成化二年遣行人諭祭弘治七年賜諡建祠歲春

秋祭

萬厯杭州府志 旌功祠在三台山祀國朝少保兵

于公墓錄卷一

二

部尙書贈太傅諡肅愍于謙弘治二年訓導儲衍禮

科給事中孫孺謙子府尹冕先後陳請命下建祠墓

所賜額汀州府知府海甯張甯爲記嘉靖十六年巡

按御史周汝員屬錢塘縣知縣李念新之嗣是而巡

按御史傅鳳翔閩鄰王紳巡鹽御史高葑相繼協修

提學副使南昌張鏊爲記

康熙錢塘縣志 旌功祠在三台山祀兵部尙書忠

肅公于謙

康熙浙江省志 忠肅公祠在三台山之陽祀少保

于公謙

康熙杭州府志 旌功祠在三台山祀少保兵部尙  
書贈太傅忠肅于公謙弘治二年訓導儲衍禮科給  
事中孫孺謙子府尹冕先後陳請命下建祠墓所賜  
額張甯爲記嘉靖十六年巡按御史周汝員屬錢塘  
縣知縣李念新之自是巡按御史傅鳳翔閩鄰王紳  
巡鹽御史高葑相繼協修萬厯三十年改謚忠肅諭  
祭葺治 國朝順治閒興修仍令春秋致祭康熙三  
十一年知府李鐸重建自爲記

梁允植錢塘縣志 旌功祠在三台山祀明兵部尙  
書忠肅于公謙

于公祠墓錄卷一

三

魏源錢塘縣志 旌功祠在三台山祀少保兵部尙  
書贈太傅謚忠肅于公謙弘治二年訓導儲衍禮科  
給事中孫孺子府尹冕先後陳請命下建祠墓所賜  
額張甯爲記嘉靖十六年巡按御史周汝員屬錢塘  
縣知縣李念新之自是巡按御史傅鳳翔閩鄰王紳  
巡鹽御史高葑相繼協修萬厯三十年改謚忠肅諭  
祭葺祠 國朝順治閒興修仍令春秋致祭康熙三  
十一年知府李鐸重建自爲記

雍正浙江省志 旌功祠萬厯杭州府志在三台山  
祀明少保兵部尙書贈太傅謚肅愍于謙西湖游覽



志弘治中賜諡肅愍表祠曰旌功有司春秋致祭萬  
曆十八年改諡忠肅

李衛西湖志 旌功祠在三台山祀少保兵部尙書  
贈太傅諡忠肅于公謙

乾隆杭州府志 旌功祠在三台山祀少保兵部尙  
書贈太傅諡忠肅于公謙弘治三年訓導儲衍禮科  
給事中孫孺謙子府尹冕先後陳請命下建祠墓所  
賜額張甯爲記嘉靖十六年巡按御史周汝員屬錢  
塘縣知縣李念新之自是巡按御史傅鳳翔閩鄰王  
紳巡鹽御史高對相繼協修萬曆三十年改諡忠肅

于公祠墓錄卷一

四

諭祭葺祠 國朝順治間興修仍令春秋致祭康熙  
三十一年知府李鐸重建自爲記

翟灝湖山便覽 旌功祠在三台山祀明少保于公  
謙公遭誣死其子冕奉喪歸葬成化二年廷議白詔  
復原官遣行人諭祭弘治二年奉敕建祠額曰旌功  
光緒杭州府志 旌功祠在三台山祀明少保贈忠  
肅于謙 國朝康熙三十一年知府李鐸重建雍正

七年總督李衛重修乾隆十一年重修嘉慶二十五  
年杭嘉湖道林則徐重修咸豐二年郡人周澍等重  
葺饗堂十一年燬於寇同治八年郡人吳煦濮詒孫

等請款重建

旌功坊


附

旌功坊弘治四年歲次辛亥夏五月吉日立 浙江  
布政使司左布政使徐珪右布政使雍恭左參政周  
季麟右參政陸容林同左參議方銓右參議黃璉韓  
鎬 按察司按察使于大節楊峻副使高銓吳伯遵  
曹時中僉事林玘雷士旃伍性林溶川曹英余琦王  
華 都指揮使司都指揮僉事崔允張灝黃華張洪  
吳昇 杭州府知府張縉同知邵福順仁和縣知縣  
陳榮錢塘縣知縣余本釗管工官陰陽學正術顧洪

千公祠墓錄卷一

五

旌功祠圖



憐忠祠

欽定圖書集成 憐忠祠在府城太平坊南新街

田汝成西湖游覽志 憐忠祠在清河坊內祀皇明

贈太傅于肅愍公謙正統十三年英廟北狩謙以兵

部尙書當國有功竟以誣戮敕建憐忠祠於其故第

萬厯杭州府志 憐忠祠在太平坊南新街爲太傅

于謙故居里故建祠以祀大理卿仁和夏時正爲記

康熙浙江省志 旌功祠在太平里南新街爲太傅

忠肅公于謙故居

康熙杭州府志 憐忠祠在太平坊南新街乃少保

于公祠墓錄卷一

六

兵部尙書錢塘于公之鄉人建以祠公者也公歿之  
十年爲成化二年憲宗遣行人馬璇諭祭於時鄉人  
莫不感奮興嗟仰惟天語眷勤渥恩汪濊惟安靈無  
所乃言之巡按浙江監察御史高唐劉魁卽公故第  
爲祠而奉制辭憐忠之語名之

康熙錢塘縣志 憐忠祠在太平坊南新街亦祀太

傅于謙大理寺卿夏時正有記又南新街內有憐忠

祠以祀忠肅于公祠後有奉眞軒搢紳釀金創建庶

常胡嘉有記

硯靖西湖志 南新街內有憐忠祠卽于忠肅公故

第也弘治初敕建里人多往祈夢今名旌功

乾隆杭州府志 憐忠祠在太平坊南新街爲于忠肅公居里故建祠以祀公以讒死天下冤之杭人卽公南新街故宅爲位而哭歲時拜謁焉旣而詔復官遣祀而誄以文曰謙之忠予憐之於是杭人呼故宅曰憐忠祠


故宅 附

魏嶠錢塘縣志 忠孝坊內有于忠肅宅堂廡甚狹前有雙柏蒼翠撲人康熙火災此堂獨歸然存今呼後忠孝巷

于公祠墓錄卷一

七

憐忠祠圖



墓

欽定圖書集成 兵部尙書贈太傅諡忠肅于謙墓

在錢塘三台山麓成化二年諭祭

欽定大清一統志 于謙墓在錢塘縣西十二里三

台山麓明成化二年建祠曰旌功

明一統志 于肅愍公墓在三台山

田汝成西湖游覽志 赤山之北爲三台山有于忠

肅公墓于公名謙字廷益錢塘人英廟北狩時公以

兵部尙書任國事外攘內撫有社稷功英廟復辟姦

臣石亨徐有貞等忌譖之誣公不軌竟以冤死其子

于公祠墓錄卷一

八

冤奉葬於此成化二年廷議始自上遣行人馬暉諭

祭之弘治七年賜諡曰肅愍建祠曰旌功萬曆十八

年改諡曰忠肅

萬曆杭州府志 兵部尙書贈太傅諡肅愍于謙墓

在錢塘縣南山尉司上扇成化二年被旨營墓

萬曆錢塘縣志 太傅忠肅于謙墓在三台山麓

康熙浙江省志 兵部尙書贈太傅諡肅愍于謙墓

在錢塘縣南山尉司上扇成化二年被旨營墓

康熙杭州府志 兵部尙書贈太傅諡忠肅于謙墓

在錢塘三台山麓成化二年諭祭

梁允植錢塘縣志 太傅忠肅于謙墓在三台山麓

成化二年丙戌十二月諭祭

康熙錢塘縣志 兵部尙書贈太傅諡于謙墓在三

台山麓成化二年諭祭公墓在祠內卽於墓前建祠

康熙三十一年杭州知府李鐸修葺移祠於墓之西

雍正浙江省志 明兵部尙書贈太傅諡忠肅于謙

墓錢塘縣志在三台山麓明成化二年諭祭 國朝

康熙三十一年杭州知府李鐸修葺雍正七年總督

李衛飭屬員重修祠墓

姚靖西湖志 于忠肅公墓忠肅名謙英廟北狩公

于公祠墓錄卷一

九

以兵部尙書任國事有社稷功及天順復辟爲姦臣  
譖誣論死其子冤奉葬於此弘治七年建祠曰旌功

康熙二十六年重修

李衛西湖志 明兵部尙書贈太傅諡忠肅于謙墓

在三台山成化二年遣行人馬璇諭祭

乾隆杭州府志 兵部尙書贈太傅諡忠肅于謙墓


在縣西十二里三台山麓明成化二年建祠每秋月

杭人蠲潔于祠中祈夢最驗 國朝康熙三十一年

杭州知府李鐸修葺雍正七年總督李衛飭屬員重

修祠墓

墓圖



于公祠墓錄卷一

十

祀典

康熙杭州府志 祀旌功祠禮明于肅愍公謙成化  
 二年遣行人諭祭仍賜歲一祀弘治二年贈官賜諡  
 建祠墓所加爲春秋祀以二仲月擇日致祭用剛鬣  
 柔毛以長官主之

明憲宗諭祭文 維成化二年歲次丙戌十二月戊  
 戌朔越十一日戊申皇帝遣行人司行人馬璇諭祭  
 故少保兼兵部尙書于謙曰卿以俊偉之器經濟之  
 才愍事先朝茂著勞績當國家之多難保社稷以無  
 虞惟公道而自持爲權姦之所害在先帝已知其枉

而朕心實憐其忠故復卿子官遣行人諭祭嗚呼哀其死而表其生一順乎天理厄於前而伸於後尤愜乎人心用昭百世之名式慰九泉之意靈爽如在尙其鑒之

明孝宗贈官諭祭文 奉天承運皇帝制曰朕惟功大者褒典宜隆行偉者揚名必遠惟顯忠於既往斯勵節於方來古今攸同豈容緩也故少保兵部尙書于謙氣稟剛明才優經濟兼資文武茂著聲猷當皇祖北狩之時正國步艱危之日乃能殫竭心膂保障家邦選將練兵摧鋒破敵中外賴以寧謐人心爲之

于公祠墓錄卷一

十一

晏然迴鑿有期論功應賞不幸爲權姦所構乃隕其身輿論咸冤卹恩已錫茲復贈特進光祿大夫柱國太傅謚肅愍命有司立祠致祭用昭欽崇之義嗚呼執羈勒守社稷勞蓋均焉表忠直愧回邪理則明矣誕敷嘉命永賁幽局靈爽如存尙其歆服弘治三年

三月十四日

明神宗賜謚忠肅諭祭文 維萬曆十八年歲次庚

寅二月癸酉朔越十六日戊子皇帝遣都御史傅孟春諭祭太傅兵部尙書于謙謚忠肅曰惟卿鍾靈開氣著望先朝屬多難以馳驅矢孤忠於版蕩社稷是



守力摧城下之要盟樽俎不驚坐鎮道傍之流議返  
皇輿於萬里維國祚以再安赤手扶天不及介推之  
祿丹心炳日寧甘武穆之冤此卹典所以浡加而公  
論猶爲未愜爰頒諭祭載易嘉名賁華表於重泉表  
清風於百世卿靈不昧尙克祇承

明神宗賜祀典諭祭文 惟萬曆二十三年歲次乙  
未八月辛丑朔越二十四日甲子皇帝遣太常寺少  
卿鍾化民諭祭於太傅兵部尙書于謙曰惟卿扶輿  
閒氣社稷孤忠當己巳之虜氛屬家邦之多難矢精  
誠而徇國竭心力以回天持危定傾皇輿再造排遷

于公墓錄卷一

三

主戰神鼎不搖惜大功之未酬憾羣姦之肆害沈冤  
雖白特典當稽魂游武穆之西湖血灑文山之燕市  
卹恩寵被旌未泯之忠勳敕祀專崇勵將來之風教  
爰頒諭祭庶慰英靈

明人祠祭文 維弘治某年歲次某甲子二月某甲

子朔越某日某甲子浙江杭州府某官某等謹以牲

醴庶品昭告於少保兵部尙書贈特進光祿大夫柱

國太傅謚肅愍于公曰惟公志秉公忠才兼經濟逢

時艱危安內攘外社稷之功世永不忘報祀之典恩

命用彰時維仲春秋竭誠將事公靈有知聿來鑒只尙

饗 祭品豬一口羊一腔鰾首五分粉湯五分果子

五色

每色重五觔

按酒五盤鳳雞一隻燂骨一塊燂魚一

尾雞湯一分魚湯一分酥餅酥餛各四盤降香一炷

燭一對焚祝紙一百張酒二瓶

吳原歐陽信祭于公文 欽差巡視兩浙地方戶部  
左侍郎兼都察院右僉都御史吳原員外郎歐信謹  
以清酌庶品之奠致祭於少保兼兵部尙書贈特進  
光祿大夫柱國太傅謚肅愍于公之神曰嗚呼木高  
必摧行高必毀從古則然奚特今爾吁嗟乎公智足  
以闡大猷才足以當大寄憶在震業之秋克勵修崇

于公祠墓錄卷一

三

之志奠宗社於再安屹長城於旣圮聲名遍滿乎華  
夷勳業掀揭於天地奈何入之望公者方隆而時之  
忌公者亦至遂使黃金燦於眾口白璧點於蠅矢故  
蹇蹇孤忠雖暫厄於一時而堂堂大節終暴白於萬  
世憐忠之詔斯頌旌功之典特被秩加保傅之尊名  
易肅愍之懿儼廟貌之巍峩與岳祠而並峙蓋公之  
心與武穆之心實異世而同符公之功視武穆之功  
蓋有加而無替嗚呼西湖之山秀且奇西湖之水清  
且瀾偉乎二公之清名峻節實照耀乎山水而無愧  
原等肅拜儀刑戴瞻烏履手此瓣香精誠攸萃公乎

英靈式克欽正尚饗

馮玘等祭于公文 巡按浙江監察御史馮玘戶部  
郎中王定安主事方良節工部主事張瑋謹以牲醴  
庶品敢昭告於故少保兼兵部尚書贈特進光祿大  
夫柱國太傅謚肅愍于公之神曰嗚呼公平實天生  
弭亂之英聖作出羣之傑非偶然也有因心之忠誼  
有幹事之才謂始官臺察克振風猷由是受知官長  
簡在帝心超擢卿貳委以撫循中原之計十有八年  
於外其活人之智及物之仁蓋已有足以永世辭而  
壽國脉者矣及遭國家己巳之變醜虜陸梁臯輿北

于公墓錄卷一

古

狩天步艱難人心顛危社稷幾搖矣而獨以一身繫  
天下安危掖留監國請誅有罪以靖朝行繼折將謀  
出陣閉門以堅士志卒屈虜兵燒散糧芻不遺敵資  
堅絕和議不墮虜計沮遷都之謀決迎轡之議不援  
虛報料敵也審計徙寓虜防變也豫遂使強胡悔服  
民社奠安公之功在天下大矣不幸殞於姦誣非其  
智不足以周身也蓋許國忘家成仁取義公之致命  
素志已定至是始遂焉耳宜其身無愧於古人而冤  
迄雪于清世也玘等感慨於斯懷仰功烈積日滋久  
每思一酌祠下以寫哀曲而道遠無由茲者俱奉命

於朝有事於浙惟杭實公故里西湖之潯南峯之麓  
山長水闊英靈所歸體魄攸託心甚依焉今無事且  
還敢相與瞻拜幽堂以償夙願謹以酒肴用將誠敬  
惟公有神其飲食之謹告

徐珪等祭于公文 浙江布政使司左布政使徐珪  
等提刑按察使于大節等都指揮使司都指揮使王  
正等謹以清酌庶羞之儀致祭於故少保兼兵部尙  
書贈特進光祿大夫柱國太傅諡肅愍于公之神鳴  
呼惟公德在生民功在社稷信史穹碑特書屢書蓋  
有不能盡言者不幸厄於權姦歿於非辜仁人義士

于公祠墓錄卷一

五

痛心流涕復有不忍盡言者雖然橫禍猝發於一朝  
非人力所能免也而公論隨定於當世有不待百年  
而後伸此則天理在人心有不可終泯者而聖君英  
主所以鑒昭忠義雪灑冤憤者猶有足以慰忠魂義  
魄於九泉而快孝子誠臣之心於萬世也珪等晚生  
仰止大忠感激高義久矣邇者分司浙越實公鄉邦  
竊幸得因閒暇修理玄廬以伸平素之私茲乃幸逢  
新天子明聖軫念功臣俯從遺孤之請兼隆贈諡之  
恩特進階極品陟位三公又以功宗在禮合有專祀  
下命方岳立祠墓所以時享之蓋將俾與岳武穆王

同食報於無窮也嗚呼公與武穆異世而同跡異事  
而同心者武穆功垂成而被沮終有遺恨矣公功已  
顯而見忌歿何愧焉況賊檜死誰祀而武穆廟祀至  
於今益隆安知後之祀公不如今之祀武穆邪珪等  
旣祇奉明命督有司從事于新祠爰偕同列謹以菲  
儀躬詣神宅前爰陳肅將誠敬惟公其鑒臨之

吳一貫等祭于公文 巡按浙江監察御史吳一貫  
黃世經工部主事姚文灝高濟南京戶部主事劉景  
寅謹以牲醴庶品致祭於太傅于肅愍公之神曰天  
眷我太祖太宗有用夏變夷之治偃武修文之功故

于公祠墓錄卷一

十六

純佑於聖子神孫每生賢以傾其否而蓄才以濟其  
屯當英皇之北狩實國步之一艱不有夫子之宏達  
夫孰拯救乎其閒功則多有忠或見疑遭權姦之構  
禍幸天日之無私而晦於前者竟白於後厄於身者  
自昌於時一貫等引領高風並命兩浙方奔趨以竭  
誠胡徘徊而增咽無乃中心憤切北虜跳梁使夫子  
而尚在則何憂乎犬羊吾聞英雄雖死而不朽不昧  
鬼神雖幽而至靈至虛今當何以備虜庶或有以啟

子尙饗

李默等祭于公文

維嘉靖二十六年十月戊申朔

越三十日丁丑晚生浙江承宣布政使司右布政使  
李默浙江提刑按察使司僉事謝體升謹以潔牲醴  
齊致祭於故太傅肅愍于公之墓曰嗚呼死社稷易  
安社稷難公以赤手障彌天之虜而廟謨獨運以危  
言折南遷之議而姦膽俱寒使中國失君而有君皇  
輿幾缺而復完雖茹冤於亨理之手賴英皇尋以察  
其忠丹獨易儲之際孰啟禍端豈力制於中斷抑事  
奪於禮官矧景皇大漸其岌岌公嘗抗疏反正而眾  
謹吁嗟平公之情事揭日月而可觀彼晉移江左宋  
竄臨安何謀國之大舛竟齋憤於回鑿哀古人之著

于公祠墓錄卷一

七

節橫斧鑕而糜肝或心蹟未白而輒得奇禍或身先  
隕越而志業未殫揆公樹立孰與嶢岌苟功收於定  
國縱齋醢其奚歎旂常炳朗百代欣看默等感公氣  
偉奉國憂攢慨邊防寢其極壞安得起英爽之桓桓  
松楸瞻敬魂珮珊珊牲牲牲玄泚寫恨幽壇尙饗

張遂祭于公文 兩浙都轉運鹽使司致仕運使門  
生張遂謹以牲醴庶品敢昭告於少保兵部尙書贈  
太傅于肅愍先主之神曰惟天純佑家邦篤生賢良  
非偶然也當正統己巳之變醜虜憑陵鑿輿北狩時  
事倉皇實賴天挺人豪爲國棟梁扶顛持危內修外

攘如盧扁之愈疾神妙其方卒致強胡敗走兵威振  
揚宮車遠復國步寧昌神人安慰物阜時康社稷之  
功可以銘彝鼎而書太常夫何功高見忌羣謀不臧  
姦誣莫辨烏盡巧藏罹此奇禍乾坤爲之改容人心  
舉皆痛傷然可誣者先生之一身難泯者先生之忠  
亦是以不百年而公道昭彰知枉之明肇於英廟憐  
忠之祭仰荷憲皇當今聖天子用廣先朝之德意卹  
恩汪洋贈秩易名春秋專祀西湖之曲南山之陽新  
祠舊豕廟貌輝煌遂投老家居無由躬拜祠下夙承  
教育之恩造就之德沒齒難忘緘辭千里遙奠一觴

于公祠墓錄卷一

七

南望嗚咽有淚盈眶英靈不昧鑿我衷腸嗚呼遂聞  
自古忠臣烈士凡血食於民者爲民降祥方今三邊  
多事九重宵旰先生其默相之俾星垣弧矢射滅天  
狼入荒寧謐天祚靈長而旌功祀典萬世有光尙饗  
劉祥祭于公文而工部觀政進士安成忠愍公從曾  
孫晚生劉祥謹以清酌庶羞致祭於太傅于肅愍先  
生曰嗚呼先生抱經濟之雄才竭忠貞之大節初持  
繡斧中外敷歷尋升卿貳西南撫戢值國步之多艱  
正人心之脆脆進大司馬以當勁敵隱然萬里之長  
城偉矣一朝之柱石運籌帷幄以安邊迎復乘輿而

定策功足以銘彝鼎而垂竹帛奈羣凶作孽讒言橫  
及子胥墮宰嚭之謀鵬舉爲姦槍所嫉英皇實察其  
冤誣列聖追賜以褒卹保傅崇階堂堂廟食顧余小  
子心常惻惻慨念先生與先忠愍同第同朝同心同  
德先忠愍在朝廷有先見之明先生於社稷有再造  
之力義膽忠肝豐功偉績質諸鬼神而無疑驗諸人  
心而不忒先忠愍被害於事未萌之先先生受誣於  
功已成之日嘗讀先生贊忠愍畫像有曰獲乎天不  
獲乎人全其道不全其身蓋亦氣志所在忠憤所激  
仰荷朝廷清明忠義顯自昔之嫉賢蠹國者今皆身

于公祠墓錄卷一

九

伏誅夷而名汗簡冊先生有賢嗣京兆君大厥顯揚  
聲光籍籍愧余涼薄負荷弗克拜瞻之際感今悼昔  
東芻絮酒聊寫曾臆洋洋如在神其鑒格尙饗

邵琮祭于公文 四川等處提刑按察司副使姻生  
邵琮謹以清酌之奠致祭於少保肅愍于公之神曰  
惟公江浙英豪天朝柱石名著鼎彝力扶社稷恩崇  
卹典廟賜旌功春秋享祀血食無窮琮鄉邑後生忝  
居姻婭敬仰光儀再拜祠下尙饗

楊英祭于公文 嗚呼天生豪傑輔我王室節比南  
山心懸白日憶當多難公保無斃員錦害忠當亡悲



戚表死如生光前無極英伺馬首深蒙教益外父總  
戎復茲惠及今遇錢塘華表巍立外父遺言過墳當  
式敬潔一觴以罄胷臆山風吹雨代我悲泣尙饗  
孫暉祭于公文 山東等處承宣布政使司右參政  
致仕晚生孫暉謹以柔毛清酌庶羞之奠致祭於故  
少保肅愍于公之神曰惟神扶輿開氣光岳精靈及  
時奮跡虎變蛟騰蘭臺棘寺進列孤卿曰大司馬秉  
軸持衡夾輔王室濟顛扶傾發號施令電掃雷轟六  
軍一呼萬虜震驚沮南遷之議斥北和之盟吏民按  
堵宗社以寧中流砥柱湯池金城乾坤再造伊神之

千公祠墓錄卷一

千

能胡權姦之嫉妬致誣謗之莫爭朝野爲之失色天  
文爲之失經士論惜之曷已童謠歌之不平幸重瞳  
之洞鑒喜公道之復明旌功有祠贈秩易名堂堂肖  
貌邦之典刑望之者儼然丹山之瑞鳳睹之者粲乎  
碧漢之景星西湖高冢岳于並稱千秋百世爭光汗  
青暉昔瞻光範仰慕德馨九泉不作眇然於清謁廟  
庭兮如神之在傷往事兮若夢之醒來蜺旌兮髣髴  
擊鼙鼓兮砰訇凜英風兮滿室渙余涕兮霑膺陳蕪  
辭以俯瑤席薦蘋藻兮酌醪醑固知不足以慰神之  
素志聊以表吾之才誠惟神顧歆尙饗

董序等祭于公文 江西贛州府同知姻姪董序偕  
兄董庠弟董雍等謹以牲醴庶品敢昭告於故少保  
兼兵部尙書謚肅愍姑丈于公之神嗚呼人莫難於  
得君也公則際遇乎累朝人莫難於立功也公則匡  
濟平當世人莫難於全節也公則勤死乎國事人莫  
難於報祀也公則永享乎廟食人之所難公之所易  
銘書鼎彝有足徵者序等謬忝姻姪蒙愛猶子惟茲  
令辰敬陳薄奠用伸哀慕之私庶乎其昭格之  
儲衍祭于公文 直隸鳳陽府儒學訓導鄉末鰥生  
儲衍謹以牲醴庶品敢昭告於少保肅愍于公曰嗚

于公祠墓錄卷一

三

呼先生功在社稷德在生民傳在國史公論在人心  
歷萬世而不能泯者衍鄉里後生景仰山斗之心久  
矣曩者嘗以先生之忠義懇疏於上荷蒙天聽命有  
司咸一致祭尋以遺孤之請諭祭贈秩易名立祠專  
祀卹典具備公道昭明先生之死猶不死也俾我後  
生小子平日景仰之心於此幸亦伸矣敬陳薄奠用  
白我心英靈不昧鑒此微忱尙饗

徐矩祭于公文 義官姻生徐矩謹以牲醴庶羞敢  
昭告於少保兼兵部尙書贈特進光祿大夫柱國太  
傅謚肅愍于公之神曰惟公天朝柱石閒氣所生出

將入相遭際聖明初受知於宜廟由臺察而進位列  
卿時方多事掌握重兵補天浴日光輔中興屹中流  
之砥柱爲萬里之長城強胡遠遁邊塵不驚巒輿遠  
復宗社以盡其忠勳之績可方唐郭子儀宋李綱而  
有古今之史傳可徵奈何功高見忌羣邪謗行墮賊  
檜之姦計致白璧之黜蠅人心爲公痛憤朝野爲公  
不平嗚呼日久論定忠枉自明荷列聖之知憐復官  
諭祭贈秩易名用享專祀巍峩廟庭春秋之典斯具  
社稷之功已旌百千萬世足以慰公在天之靈矩也  
兼葭倚玉久仰德馨拜奠祠下惟神是歆尙饗

于公祠墓錄卷一

三

程敏政代于明祭于公文 嗚呼禮莫大於報功義  
莫先於繼絕況天定之勝人宜恩典之昭晰猗我伯  
父一代人傑厯官孤卿上輔睿哲有巍巍定難之功  
有侃侃立朝之節有孜孜及民之惠有皦皦律貪之  
潔惟許國以忘身致權姦之汙蟻中以深文濟之讒  
舌白日晝冥愁雲暮結慨重瞳之屢回驚天柱之摧  
折雖丹書之橫罹曾白玉之可涅列聖嗣統當食而  
輟追悼勳庸特加昭雪旌功有祠述行有碣嘉繼世  
之象賢悵主祀而猶缺以我小子同源一轍擇男允  
忠系於孫列迺具疏請宸聰上徹偉公議之翕然果

天顏之開悅錫世祿以奉祠士聞風而氣洩顧竊柄之權姦已伏辜而煙滅仰忠勳之流芳炳日星之長揭某涓以歲首自徽到浙俯伏祠庭一筵敬設感殊寵之下臨與有榮于衰拙冀衍慶於曾玄誓孝恩之殫竭鳳山陸窳湖水幽咽尊靈如生鑒此惓切

于明告墓文 直隸新安衛致仕千戶宗姪于明謹以剛鬣柔毛之儀敢昭告於伯考少保兼兵部尙書贈特進光祿大夫柱國太傅諡肅愍府君曰惟我祖宗河南同系因世變遷徽杭異地今我兄冕艱於子嗣國制欽選擇子恕繼敬潔牲儀用伸悃意仰惟神

于公祠墓錄卷一

壹

靈垂裕後裔而熾而昌縣延百世尙饗高傑祭于公文 親末高傑謹以清酌庶羞之奠致祭於少保兵部尙書贈特進光祿大夫柱國太傅諡肅愍于公之神曰惟公經綸之才弘毅之德功在社稷名光史冊有嚴朝典時祀不忘一旦之誣百代之長敢羞鬪毛祇謁邱墓碧草黃鸝永深悲慕尙饗李鐸祭于公文 惟康熙三十二年歲次癸酉八月初九日光祿大夫知杭州府事加五級李鐸謹致祭於明少保兵部尙書贈太傅臨安伯諡忠肅于公之神前曰惟天地之偉人鍾天地之間氣故生則爲碩

輔爲忠良沒則爲明神享廟食是以能定大計而不  
疑臨大難而不變其人之忠貞固已格天地而泣鬼  
神感風雷而薄雲霧曠百世而相感流千載而不泯  
也杭郡名山大川甲於天下秀靈之氣鬱爲偉人古  
今以來忠臣孝子代不絕書而最著者莫如忠肅于  
公憶公之至性過人爲諸生時卽慨然有天下大志  
識者已知爲救時宰相矣是以居臺垣則直言直諫  
而權貴有所不避按江右則肅法紀而冤濫爲之一  
清撫晉魏則安流亡而軍旅無不繕備當國政則安  
宗社而身家有所不知以濟世之才建安邦之烈而

于公墓錄卷一

十四

卒死於石亨等之所誣洵所謂豪傑其才而聖賢其  
行者也故生則鍾山川之靈沒則涸西湖之水其神  
靈則上格帝天下悟人主成仁取義定難扶危非古  
之所稱社稷臣者哉宜其俎豆登之廊廟姓氏垂之  
琬琰與河嶽比其靈與日星比其耀也迄今數百年  
來聞我公之名者莫不流涕嗚咽以想見其爲人非  
忠烈足以感人而能如是乎頑夫廉懦夫有立志舍  
我公其誰與歸哉嗚呼雲山渺渺古今悠悠千載而  
下誰爲匹儔

像贊

于忠肅公象

陸光祺敬繪



于公祠墓錄卷一

三

王世貞于公像贊 己巳之歲治極而疵孽牙其間  
逆胡麀至猶盜蝟起當六飛北狩之初倡羣小南遷  
之議泥馬殆於汗踵銅駝亦垂蒙棘物情競變大事  
欲非時則有若少保兵部尙書贈太傅錢塘于肅愍  
公謙字廷益入贊樞庭受知黼展出片言而折利害  
捐百口以定安危九鼎屹乎如山萬姓因之奠枕乃  
若受服若鉞擐甲郊畿温言拊循士如挾纊振臂一  
呼瘡痍盡起温禺日逐之羣旣豨突而爭進忽狼戾  
而反奔然後勵精臥薪開誠推轂軍事旁午動中機  
宜尺書所臨咸驚廟算以故羅施鬼方之域泔荆夜

郎之黎雖叛者九起而蕩平相屬戰龍甫戢玄黃之  
血未乾飛羽向寧赤白之囊自鮮身危震主禍發殺  
機長謳告逝毋忝廣陵之彈恩綸繼褒獲返關西之  
葬所云功首豈亦有臯耶余小子叨列旬宣薄游吳  
會循覽往昔有慨於中因爲之贊以昭其盛其辭曰  
蹇蹇肅愍盡瘁旬宣綏晉及周十有八年晚贊中樞  
力折羣姦屹如砥柱以奠播遷折箠匈奴飛檄黎庭  
黃屋長尊紫蓋不愆文武吉甫萬邦爲憲嘽沓背憎  
匪降自天百身曷贖九有稱冤勝繇天定功以久明  
小子吏浙敬聆德聲詮管作頌敢告司盟

千公祠墓錄卷一

三

夏時正于公像贊 抱全所昇養有剛明之氣急先  
所務規恢天下爲慮壹以忠誠上結明主之知不以  
身家致爲行己之累此功業之所自基而允乎公輔  
之具也保釐窮鰥衣衣食振整墮積廢寢忘味四  
方漸以削平屬國咸知姓氏此公功業之爲隆而漏  
萬特挂其一二也屬茲陽九運厄鑿輿出狩北逝眾  
議南遷公則痛懲宋人之失計寇逼圍城公則赴敵  
捐生以自誓用全京師百萬生靈保安宗社無疆斯  
世此公功業之大人不得窺其涯涘也功當裂土封  
侯河山帶礪事須報讎雪恥口曳未濟不自有而曾

若無有無可貫而寧不自貫不知己之孤立不顧人之疾忌大臣當事君以忠惟君能使臣以禮明明日麗層霄湛湛漏澤九地諭祭則昭有憐忠之文節惠則炳乎肅愍之謚輝煌紫誥丹書信史公孤保傅春秋歲祀天子萬年世祝勿替

于公祠墓錄卷一

三

嗚呼然則公當日之被害者豈英宗皇帝之本心也

邪

劉鳳誥題于忠肅公畫像 阮中丞述孫御史言如

上考明史紀傳證以倪文毅爲公神道碑益信其是夫沂王當復大義也豈公願忘之然而章鍾廖諸君子旣因是先後獲譴公復以重臣彊諍如國體何至於景帝彌留公乃坦然行其志矣明史書景泰八年正月丁丑帝輿疾宿南郊齋宮己卯羣臣請建太子不聽碑曰正月丁丑景皇帝不豫公同廷臣上章乞復皇儲未報公上疏復儲月日不出乎此它時憲宗



在位獨不許論廢立事謂黎澗曰景泰事已往朕不  
介意且非臣下所當言蓋先年已簡及公疏降制追  
卹復公子官可以明其志也羣言安足論哉嘉慶十  
三年十月朔拜公祠墓月望題公畫像於浙學使院  
胡敬于忠肅公像贊 道光丁亥冬十一月忠肅公  
十三世孫銜奉公神儀屬敬題贊敬惶悚避席禮沐  
展觀按公像闊面微髭神采炳若圓領窄袖蟒玉燦  
然佩有牙牌文曰少保攷明制窄袖爲武臣之服佩  
牌乃常參之儀公以總戎兼督京旅戎容暨暨特異  
製於朝班象闕巍巍藉通名於門籍觀公像而當日

于公祠墓錄卷一

亥

九門捍禦之策十營團練之勤廟堂倚任之專宵小  
猜嫌之隙胥恍然於心目間遇之夫明堂繪像昉自  
周公良金鑄形聞諸句越公於恐懼危疑之日倡大  
義以定眾志正其善輔成王也於戎馬鋒鏑之交斥  
邪說以奠神京豈其功輸少伯也此在西漢當署名  
麟閣東都應首列雲臺矣且以唐之馬燧渾瑊尙圖  
形凌煙閣上宋之趙鼎張浚亦寫貌景靈宮中信乎  
生有大勳沒宜崇祀英廟之配殿與饗祫禘肖形丹  
青者非公誰屬哉奈何南內車駕東市朝衣徒借目  
以明冤竟碎身以成讖一腔熱血斑斑痕漬於緋袍

千載孤忠凜凜光留於素壁贊曰赤山表墓清河建坊公塋公宅公靈斯藏恆代之原瀟澗之曲公澤長留公尸公祝太弟內立上皇外歸公忠公勇公身以危收京如郭汾陽兮而天不祐殲寇如岳家軍兮而功竟就班聯特進兮牌獎殊勳爲錢越王之賜券耶抑平原之告身靈爽式憑兮像還後族其狄梁公之遺容耶是了蘭之刻木銜藏公像有年爲族子借摹遂燬於火會宋孝廉葉雲購得公及夫人遺像二幀送貯水星閣之佛龕銜聞而奉歸公靈所憑亦銜孝思追遠所格也故贊未及之徐琪于忠肅公像贊 公裔孫豫生茂才爲余門下士因豫生得瞻家藏真像惟卷軸過大且與公配董

于公祠墓錄卷一 完

夫人合繪未便出徵題詠因以白描縮摹此卷神采宛然不爽毫髮殆公之精氣有以感通也圖成贊此于氏子孫其世寶之觥觥少保篤志忠貞定傾扶危旋乾轉坤豈無遠慮嗟哉奪門丹心浩氣千古長存

于公祠墓錄卷一終



